

元

史

三

本紀卷第七

元史七

翰林學士雷太知制誥燕修國史長瀋翰林待制承直郎知制誥燕國史院總管臣王楙等奉勅修

世祖四

七年春正月辛丑朔高麗國王王禕遣使來賀丙午耶律鑄廉希憲罷立尚書省罷制國用使司以平章政事忽都荅兒爲中書左丞相國子祭酒許衡爲中書左丞制國用使阿合馬平章尚書省事同知制國用使司事張易同平章尚書省事制國用使司副使張惠簽制國用使司事李堯咨麥朮丁並參知尚書

省事己酉太陰犯畢敕諸投下官隸中書省壬子敕
驛券無印者不許乘傳甲寅高麗國王王植遣使來
言比奉詔臣已復位今從七百人入覲詔令從四百
人來餘留之西京詔高麗西京內屬改東寧府畫慈
悲嶺爲界丁巳以蒙哥爲安撫高麗使佩虎符率兵
戍其西境戊午均房州總管孫嗣擒宋統制朱興祖
等丙寅賑兀魯吾民戶鈔丁卯定省院臺文移體式
二月辛未朔以前中書右丞相伯顏爲樞密副使甲
戌築昭應宮于高梁河丙子帝御行宮觀劉秉忠孛
羅許衡及太常卿徐世隆所起朝儀大悅舉酒賜之

丁丑以歲饑罷修築宮城役夫甲申置尚書省署乙酉立紙甲局申嚴畜牧損壞禾稼桑果之禁壬辰立司農司以參知政事張文謙爲卿設四道廵行勸農司乙未宋襄陽出步騎萬餘人兵船百餘艘來趨萬山堡萬戶張弘範千戶脫脫擊却敗之事聞各賜金紋綾有差高麗國王王植來朝求見皇子燕王詔曰汝一國主也見朕足矣植請以子懃見從之詔諭植曰汝內附在後故班諸王下我太祖時亦都護先附即令齒諸王上阿思蘭後附故班其下卿宜知之又詔令國王頭輦哥等舉軍入高麗舊京以脫脫朶兒

焦天翼爲其國達魯花赤護送植還國仍下詔林衍廢立罪不可赦安慶公渴本非得已在所寬宥有能執送衍者雖舊在其黨亦必重增官秩世子湛奏乞隨朝及尚主不許命隨其父還國三月庚子朔日有食之改河南等路及陝西五路西蜀四川東京等路行中書省爲行尚書省尚書省臣言河西和糴應僧人豪官富民一例行之制可甲寅車駕幸上都丙辰浚武縣御河丁巳定醫官品從戊午益都登萊蝗旱詔減其今年包銀之半阿朮與劉整言圍守襄陽必當以教水軍造戰艦爲先務詔許之教水軍七萬餘

人造戰艦五千艘夏四月壬午檀州隕黑霜三夕設
諸路蒙古字學教授敕諸路達魯花赤子弟蔭叙充
散府諸州達魯花赤其散府諸州子弟充諸縣達魯
花赤諸縣子弟充巡檢改御史臺典事爲都事癸未
定軍官等級萬戶總管千戶百戶總把以軍士爲差
已丑省終南縣入盩厔復真定贊皇縣太原樂平縣
高麗行省遣使來言權臣林衍死其子惟茂擅襲令
公位爲尚書宋宗禮所殺島中民皆出降已遷之舊
京衍黨裴仲孫等復集餘衆立植庶族承化侯爲王
竄入珍島五月辛丑懷州河內縣大雨雹癸卯陝西

簽省也速帶兒嚴忠範與東西川統軍司率兵及宋
兵戰于嘉定重慶釣魚山馬湖江皆敗之拔三寨擒
都統牛宣俘獲人民及馬牛戰艦無算甲辰威州汝
鳳川番族八千戶內附其酋長來朝授宣命賜金符
丁未東京路饑兼運糧造船勞役免今年絲銀十之
三以同知樞密院事合荅爲平章政事乙卯復平灤
路撫寧縣以海山昌黎入之丙辰括天下戶尚書省
臣言諸路課程歲銀五萬錠恐疲民力宜減十分之
一運司官吏俸祿宜與民官同其院務官量給工食
仍禁所司多取於民歲終較其增損而加黜陟上都

地里遙遠商旅往來不易特免收稅以優之惟市易
莊宅奴婢孳畜例收契本工墨之費管民官遷轉以
三十月爲一考數於變易人心苟且自今請以六十
月遷轉諸王遣使取索諸物及鋪馬等事自今並以
文移毋得口傳教令並從之改宣徽院爲光祿司秩
正三品以宣徽使線真爲光祿使庚申命樞密院閱
實軍數壬戌東平府進瑞麥一莖二穗三穗五穗者
各一本省中都打捕鷹坊總管府入工部大名東平
等路桑蠶皆灾南京河南等路蝗減今年銀絲十之
三六月丙子敕西夏中興市馬五百疋庚辰敕戍軍

還有乏食及病者令所過州城村坊主者給飲食醫藥丁亥罷各路洞冶總管府以轉運司兼領徙謙州甲匠于松山給牛具賜皇子南木合馬六千牛三千羊一萬賜北邊戍軍馬二萬牛一千羊五萬丙申立籍田大都東南郊禁民擅入宋境剽掠秋七月辛丑設上林署乙卯賜諸王拜荅寒印及海青金符二庚申初給軍官俸壬戌僉諸道回回軍乙丑閱實諸路斂手戶都元帥也速帶兒等畧地光州敗宋兵于金剛臺以遼東開元等路總管府兼本路轉運司事山東諸路旱蝗免軍戶田租戍邊者給糧命達魯花赤

兀良吉帶給上都扈從畋獵糧八月戊辰朔築環城以逼襄陽己巳賑應昌府饑諸王拜答寒部曲告饑命有車馬者徙居黃忽兒王良之地計口給糧無車馬者就食肅沙甘州戊寅隆興府總管昔剌幹脫以盜用官錢罷庚辰以御史大夫塔察兒同知樞密院事御史中丞帖只爲御史大夫高麗世子王堪來賀聖誕節辛巳設應昌府官吏辛卯保定路霖雨傷禾稼九月庚子敕僧道也里可溫有家室不持戒律者占藉爲民丁巳太陰犯井丙寅括河西戶口定田稅宋將范文虎以兵舡二千艘來援襄陽阿朮合答劉整

率兵逆戰于灌子灘殺掠千餘人獲船三十艘文虎
引退西京饑敕諸王阿只吉所部就食太原山東饑
敕益都濟南酒稅以十之二收糧冬十月戊辰朔敕
兩省以已奏事報御史臺庚午太白犯右執法癸酉
敕宗廟祭祀祝文書以國字乙亥宋人攻莒州乙酉
享于太廟丁亥以南京河南兩路旱蝗減今年差賦
十之六發清滄鹽二十四萬斤轉南京米十萬石並
給襄陽軍已丑敕來年太廟牲牢勿用豢豕以野豕
代之時果勿市取之內園車駕至自上都降興中府
爲州賑山東淄萊路饑十一月壬寅熒惑犯太微西

垣上將壬子河西諸郡諸王頃舍僧民協力供給丁
已敕益兵二千合前所發軍爲六千屯田高麗以忻
都及前左壁總帥史樞並爲高麗金州等處經畧使
佩虎符領屯田事仍詔諭高麗國王立侍儀司安南
國王陳光昞遣使來貢優詔荅之復賑淄萊路饑閏
月丁卯朔高麗世子王懋還賜王植至元八年曆戊
辰禁繒段織日月龍虎及以龍犀飾馬鞍者己巳給
河西行省鈔萬錠以充歲費以義州隸婆婆府癸未
詔諭西夏提刑按察司管民官禁僧徒冒據民田壬
辰申明勸課農桑賞罰之法詔設諸路脫脫禾孫十

二月丙申朔改司農司爲大司農司添設巡行勸農使副各四員以御史中丞李羅兼大司農卿安童言李羅以臺臣兼領前無此例有旨司農非細事朕深諭此其令李羅總之命陝西等路宣撫使趙良弼爲祕書監充國信使使日本敕歲祀太社太稷風師雨師雷師戊戌徙懷孟新民千八百餘戶居河西壬寅陞御史大夫秩正二品降河南韶州爲潁池縣宋重慶制置朱禔孫遣諜者持書榜來誘安撫張大悅等大悅不發封併諜者送致東川統軍司丁未金齒驃國三部酋長阿匿福勒丁阿匿爪來內附獻馴象三

馬十九疋已酉魚通路知府高曳失獲宋諜者詔賞之辛酉以都水監隸大司農司以諸王伯忽兒爲札魯忽赤之長建大護國仁王寺于高良河敕更定僧服色是歲天下戶一百九十三萬九千四百四十九賜先朝后妃及諸王金銀幣帛如歲例斷死刑四十人

八年春正月乙丑朔高麗國王王植遣其祕書監朴恒郎將崔有渰來賀兼奉歲貢丙寅太陰犯畢已卯以同僉河南等路行中書省事阿里海牙參知尚書省事中書省臣言前有旨令臣與樞密院御史臺議

河南行省阿里伯等所置南陽等處屯田臣等以爲凡屯田人戶皆內地中產之民遠徙失業宜還之本籍其南京南陽歸德等民賦自今悉折輸米糧貯於便近地以給襄陽軍食前所屯田阿里伯自以無效引伏宜令州郡募民耕佃從之史天澤告老不允敕前築都城徙居民三百八十二戶計其直償之設樞密院斷事官遣兀都蠻率蒙古軍鎮西方當當丙戌高麗安撫阿海畧地玠島與逆黨遇多所亡失中書省臣言諜知玠島餘糧將竭宜乘弱攻之詔不許令巡視險要常爲之備丁亥管如仁費正寅以國機事

爲書謀遣崔繼春賈靠山路坤入宋事覺窮治正寅
如仁繼春皆正典刑靠山坤並流遠方壬辰敕諸路
鰥寡孤獨疾病不能自存者官給廬舍薪米高麗國
王王植遣使奉表爲世子懋請昏詔禁邊將受賂放
軍及科歛賑北京益都饑二月乙未朔定民間婚聘
禮幣貴賤有差丁酉發中都真定順天河間平灤民
二萬八千餘人築宮城巳亥罷諸路轉運司入總管
府以尚書省奏定條畫頒天下移陝蜀行中書省于
興元癸卯四川行省也速帶兒言比因饑饉盜賊滋
多宜加顯戮詔令群臣議安童以爲強竊盜賊一皆

處死恐非所宜罪至死者仍舊待命以中書左丞東
京等路行尚書省事趙璧爲中書右丞甲辰添設監
察御史六員命忽都荅兒持詔招諭高麗林衍餘黨
裴仲孫乙巳大理等處宣慰都元帥寶合丁王傳闊
闊帶等協謀毒殺雲南王火你赤曹楨發其事寶合
丁闊闊帶及阿老瓦丁亦速夫並伏誅賞楨火你赤
及證左人金銀有差以沙州瓜州薦坊三百人充軍
戊申詔以治事日程諭中外官吏敕徃畏吾兒地市
米萬石庚戌申嚴東川井鹽之禁己未敕軍官佩金
銀符其民官工匠所佩者並拘入勿復給敕海青符